

Kedudukan Singapura Dengan Usaha-usaha Menamatkan Konfrontasi Malaysia-Indonesia

Semenjak persetujuan di Bangkok di antara Tun Abdul Razak Timbalan Perdana Menteri Malaysia

dengan Adam Malik Menteri Luar Indonesia ditandatangani kerajaan Malaysia telah mengemukakannya ke dalam *Parliament* dan mempersetujukannya sedang dari pihak Indonesia belum ada “kata muktamad” di dalam soal ini sekalipun daripada punca-punca rasmi zahir bahawa mereka akan mempersetujukannya dan akan segera menamatkan Konfrontasi yang juga berbahaya untuk keselamatan ekonominya.

(Oleh pengulas khas kita)

Apasebab-sebabnya yang nyata melambatkan Indonesia mengesahkan Persetujuan Bangkok tidak dapat diketahui dengan sebenarnya. Ada sangkaan-sangkaan disebabkan Kabinet Indonesia belum dibentuk dan ada pula yang menyangka bahawa hal ehwal di dalam Indonesia sendiri belum beres lagi.

Tetapi selalu kita mendengar kata-kata mengenai dasar bahawa adalah dikehendaki supaya maruah (kehormatan) kedua-dua pihak dikawal dan dijaga. Apakah yang dimaksud dengan persetujuan di dalam Rundingan Manila dahulu tidak dijelaskan tetapi yang lahir ada dua perkara yang mungkin akan timbul iaitu persoalan MAPHILINDO dan persoalan kedudukan kubu-kubu tentera asing di timur jauh itu.

Dalam persoalan MAPHILINDO, Tengku Abdul Rahman, sesudah ada persetujuan Bangkok itu, mengumumkan bahawa beliau tidak bersetuju dengan MAPHILINDO. Beliau memandang MAPHILINDO itu menimbulkan perkauman. Sebagaimana juga apabila persoalan MAPHILINDO keluar sesudah Persidangan Manila dahulu Perdana Menteri Lee Kuan Yew (dalam masa

Singapura bercantum lagi dengan Malaysia) ialah orang-orang yang pertama membantah Tengku mempersetujui MAPHILINDO dan membidas Tengku dengan hebatnya kerana belum mengambil mandat di dalam soal itu.

Genting yang membentuk MAPHILINDO itu tentunya melihat kejadian-kejadian di dalam negara-negara yang berkaitan: Indonesia, Thailand dan Filipina hidup langkah-langkah yang memusuhi orang Tionghua yang menguasai ekonomi di negara-negara itu. Inilah juga soalnya yang menjadikan Tengku Abdul Rahman menyebut soal MAPHILINDO ialah soal perkauman kerana dengan sendirinya sama ada Singapura masuk atau tidak di dalam Malaysia, kedudukan orang-orang Tionghua mestilah dikawal. Tetapi adakah Indonesia akan berganjak di dalam soal ini? Oleh kerana persoalan menyatukan satu rumpun penduduk gugusan pulau-pulau Melayu ini bukan baru ini timbul tetapi telah ada dan telah dikemukakan dalam masa Manuel Quezon menjadi Presiden kerajaan Filipina lagi.

Pejuang-pejuang utama dalam siasah Indonesia telah mempersetujui

konsep ini dulu di dalam Persidangan Manila dan inilah yang mungkin menimbulkan adanya MAPHILINDO untuk menghimpunkan suara dan maslahat satu rumpun yang berketurunan di antara kerajaan-kerajaan di gugusan pulau-pulau Melayu ini.

Di dalam persoalan inilah menjadi suatu tanda tanya yang besar tentang berdirinya negara Singapura di tengah-tengah rumpun bangsa-bangsa di gugusan pulau-pulau Melayu disebabkan bahawa 80 peratus lebih penduduk Singapura itu terdiri dari orang-orang Tionghua. Walau bagaimanapun percubaan Perdana Menteri Lee Kuan Yew, menurut pendapat kita, hendak mengatakan bahawa penduduk Singapura ini, *Singaporean* namun orang lain mungkin memandang bahawa, dengan sifat-sifat yang ada, tabiat, akhlak, kebudayaan adalah kebudayaan Tionghua. Mereka akan mengetahui pula bahawa di mana pun mereka berada tabiat-tabiat ini tidak akan dapat hilang daripada mereka itu. Dengan kerana itu maka langkah Tengku Abdul Rahman mengasingkan Singapura dipandang oleh orang luar, daripada apa yang didengar, menubuhkan sebuah negara China di tengah-tengah gugusan pulau-pulau

Melayu. Ia berkeadaan sebagai duri dalam tubuh.


Tentang perkara pangkalan atau tentera British, sesudah persetujuan Bangkok, Malaysia dengan segera mengumumkan penarikan tentera-tentera asing di tanah Malaysia terutamanya di Sabah dan Sarawak yang tentunya boleh jadi menyempurnakan salah satu syarat yang dipersetujui di dalam persetujuan di Bangkok.

Tetapi Singapura yang telah berdaulat itu, Perdana Menterinya, dalam masa rundingan di Bangkok telah pergi ke London merundingkan persoalan kedudukan pangkalan British di Singapura.

Nampaknya, daripada apa yang dapat dilihat, bukannya rundingan untuk menolak pangkalan British di Singapura tetapi mengekalkannya disebabkan, oleh keadaan-keadaan yang memaksa, mungkin untuk menghidupkan keadaan buruh-buruh di dalam pangkalan-pangkalan tentera itu terlepas daripada menjadi pengangguran yang tentunya menjadi beban kerajaan menyempurnakan kehidupan mereka bagi keselamatan negara ini. Sebaliknya pangkalan-pangkalan yang ada dan yang telah diduduki adalah tanah-tanahnya dipunyai oleh tentera-tentera British yang dikuasakan oleh undang-undang tanah.

Inilah yang dikatakan boleh jadi sebab mengapa Menteri Penerangan British Tuan Hailey menyatakan bahawa perjanjian kerajaan British dengan Singapura tidak dapat dibuat. Melainkan sesudah ada pengesahan dan pengakuan yang ditandatangani tamatnya konfrontasi di antara Malaysia dengan Indonesia.

Selain daripada itu semenjak



Masjid Badshahi di Lahore Pakistan.

ribut-ribut Konfrontasi ditamatkan dan semenjak timbulnya harapan-harapan pulihnya semula hubungan di antara Singapura dengan Indonesia, dalam masa menukar belum ada hubungan-hubungan peringkat menteri dibuat. Ia hanya ada cakap-cakap sahaja yang tidak boleh dipertanggungjawabkan. Adakah akan ada hubungan semula antara Singapura dengan Indonesia kalau pangkalan British masih tetap di Singapura? Inilah persoalan-persoalan yang menjadi suatu tanda tanya kerana mungkin sekiranya ada pangkalan British di sini dan didapati persetujuan di antara Malaysia harus hubungan keduanya makin rapat sedang perhubungan dengan Singapura ditinggalkan dan segala perhubungan perniagaan diputuskan di Port Swettenham dan Pulau Pinang untuk menghidupkan industri-industri Malaysia atau pangkalan hubungan ekonomi di antara kedua negara itu tidak dengan Singapura. Adalah sangat diharap

tidak terjadi demikian.

Inilah dua faktor yang menjadi tanda tanya yang besar yang mungkin menjadi sebab lambatnya persetujuan menamatkan Konfrontasi – iaitu persoalan MAPHILINDO, persoalan pangkalan British dan persoalan berdiri sebuah negara yang dipandang mereka sebuah negara Tionghua di tengah-tengah gugusan pulau-pulau Melayu. Sama-sama lihat kesudahannya.

Berita Ringkas

Dalam suatu kenyataan yang dikeluarkan di Beirut, Jawatankuasa Tertinggi Palestin membantah akan adanya perjanjian persenjataan di antara Amerika dengan Israel, dan menganggap bahawa perjanjian tersebut adalah bertujuan untuk menghancurkan negara-negara Arab.